

每週經課朗誦經文(巴克禮台語漢字)2014/08/03

共同經課 - 1

創世記三十二章二十二節～三十一節

22 伊暝時起來，導伊二個某，二個女婢，及十一個子，攏過雅博的渡頭，23 代先互in過溪，凡所有的亦互in過，24 只有剩雅各家已佇喲。有一人來及伊相偃，到佇天晡光。25 彼人看袂贏伊，就搨雅各的大腿白，相偃的時雅各的大腿白差著。26 彼人講：「天欲光啦，著放我去！」雅各講：「你若無給我祝福，毋放你去。」27 彼人講：「你名做甚麼？」伊講：「我名做雅各。」28 彼人講：「你的名無欲閣叫雅各，欲叫做以色列；因為你及上帝及人鬥輸贏，攏得著卡贏。」29 雅各問伊講：「請將你的名給我講。」彼人應講：「乜使問我的名？」就佇遐給伊祝福。30 雅各名彼所在叫便以利，因為講：「我當頭對面見著上帝，我的生命猶得著保全。」31 日抵仔出，雅各經過便以利，伊的大腿已經跛。

共同經課 - 2

詩篇十七篇一節～七節，十五節

1 〔大衛的祈禱〕耶和華啊，求你聽公義，留心聽我的求叫！我的祈禱毋是對奸詐的嘴唇出，求你俯耳孔來聽！2 願我的判詞對你的面前發出；願你的目矚鑑察正直。3 你已經試驗我的心；你佇暝時鑑察我；你鍛煉我，無尋著甚麼；我立志互我的嘴無有過失。4 論到人的行做，我趁你所講的話家已謹守，無行強惡人的路。5 我的腳定行你的路；我的腳未曾踏趨。6 上帝啊，論到我，我曾求叫你，因為你欲應我；求你俯耳孔，聽我的話。7 求你顯明你各樣的仁慈；你是用正手救倚靠你的人脫離許個起來攻擊in者。15 論到我，我欲佇義的中間看見你的面；我睏醒的時，看見你的形容就心滿意足。

共同經課 - 3

羅馬書九章一節～五節

1 我惦佇基督講話真實無白賊，我的良心佇聖神及我相及做干證：2 我有大憂悶，痛心無息；3 因為我為著我的兄弟，我的骨肉的至親，就若本身受咒詛，離開基督也甘願。4 in是以色列人；有做子的名份、有榮光，有諸個約、有律法的傳授、有服事的禮儀，及諸個應允攏屬佇in。5 列祖是in的祖，照肉體來論，基督也對in出。伊是萬物的頂面，是上帝堪得謳佬到代代的。阿們！

共同經課 - 4

馬太福音十四章十三節～二十一節

13 耶穌聽見，就上船對遐退去曠野，家已住。眾人聽見，就對諸個城步行隨伊。14 伊出去，看見歸大陣的人，就憐憫in，醫好in中間有病的。15 日晚晡，學生就近伊，講：「遮是曠野，閣時已經過，著互眾人四散，通去鄉社買食。」16 耶穌給in講：「in毋免去，恁互in食！」17 in給伊講：「阮佇遮只有五個餅，二尾魚。」18 伊講：「提來互我。」19 就吩咐眾人坐佇草埔，就提彼五個餅，二尾魚，向天來祝謝，擘餅互學生，學生互眾人。20 攏食到飽，拾所剩的屑仔，滿十二筐。21 食的人，婦仁人团仔以外，約略五千。